

Svar

fjármálaráðherra við fyrirspurn Vigdísar Hauksdóttur um sæstrengi.

1. *Hverjir eru eigendur sæstrengjanna Danice, Farice, Cantat-3 og Greenland Connect og í hvaða hlutföllum er eignarhaldið?*

Farice og Danice sæstrengirnir eru í eigu Farice ehf. en hluthafar þess félags eru íslenska ríkið, Landsvirkjun, Arion banki, Landsbanki Íslands hf. og Glitnir banki. Eignarhlutföll Farice ehf. eru þessi:

Íslenska ríkið	28,07%	A- og B-hlutir
Landsvirkjun	26,69%	A- og B-hlutir
Arion banki hf.	43,47%	B-hlutir
Landsbanki Íslands hf.	1,05%	B-hlutir
Glitnir banki hf.	0,71%	B-hlutir

Þegar tekið er tillit til mismunandi atkvæðavægis á milli A- og B-hlutabréfa, þar sem A-hlutir hafa fimmfalt vægi á móti B-hlutum, þá er atkvæðavægi á hluthafafundum þannig að íslenska ríkið er með 58,2%, Landsvirkjun 21,4% og Arion banki 19,7%.

Rekstri Cantat-3 sæstrengsins var hætt um síðustu áramót en strengurinn var tekinn í notkun 1994. Cantat-3 var í eigu síma- og fjarskiptafélaga í nokkrum löndum og áttu íslenskir aðilar rúmlega 5% hlut.

Greenland Connect sæstrengurinn er í 100% eigu Tele Greenland.

2. *Er ríkisábyrgð á sæstrengjunum? Hefur þurft að afskrifa skuldir vegna þeirra?*

Ríkisábyrgð er á hluta þeirra veðtryggðu langtímalána Farice ehf. sem til var stofnað vegna lagningar Farice og Danice sæstrengjanna. Alls nema veðtryggðar skuldir með ríkisábyrgð 7 milljörðum kr. en heildarskuldir félagsins eru um 9,3 milljarðar kr.

Í viðskiptaáætlun fyrir lagningu Danice sæstrengsins var gert ráð fyrir að gagnaver mynduðu kjölfestuna í tekjum af þeirri fjárfestingu. Uppbygging á þeirri starfsemi hefur hins vegar verið hægari en áætlanir gerðu ráð fyrir sem hefur raskað forsendum viðskiptaáætlunarinnar. Við fjárhagslega endurskipulagningu Farice lagði íslenska ríkið og Landsvirkjun félaginu til nýtt hlutafé í A-flokki að fjárhæð 11 millj. evra. Stærstu óveðtryggðu kröfuhafar félagsins samþykktu að breyta sínum kröfum í hlutabréf í B-flokki í félaginu, samtals að fjárhæð 52,7 millj. evra. Hlutafé félagsins hefur því verið aukið um samtals 63,7 millj. evra og er eftir endurskipulagninguna um 75,5 millj. evra. Veðtryggðir lánveitendur Farice ehf. hafa samþykkt að endurfjármagna skuldir félagsins. Heildarskuldir eftir endurskipulagningu nema um 56,5 millj. evra. og eiginfjárlutfall félagsins er 45,5% í árslok 2010.

3. *Hver er bandbreidd sæstrengjanna?*

Uppsett bandbreidd Farice og Danice sæstrengjanna er 100 Gbit/s á hvorum streng. Hægt er að auka flutningsgetuna með uppsetningu endabúnaðar í landtökustöðvum. Slíkar fjárfestingar munu fylgja aukningu viðskipta í framtíðinni.

Fjármálaráðuneytið býr ekki yfir upplýsingum um hver bandbreidd sæstrengja í eigu annarra er.

4. *Hversu hátt hlutfall af hverjum þeirra um sig er í notkun og hverjir kaupa þjónustuna?*

Meðfylgjandi tafla sýnir hvernig nýting sæstrengjanna Farice og Danice er í maí 2011, miðað við þá bandvidd sem er til reiðu í dag:

Sæstrengur	Bandvidd til reiðu í maí 2011	Hlutfall bandviddar í notkun samkvæmt samningum
FARICE	100 Gbit/s	45%
DANICE	100 Gbit/s	55%

Bandvidd sú sem seld er samkvæmt framangreindu skiptist á núverandi viðskiptavinum í eftirfarandi hlutföllum:

- Íslensk síma- og fjarskiptafélög 41%,
- Erlend síma- og fjarskiptafélög 15%,
- Aðilar sem reka rannsókn- og háskólanet 17%,
- Gagnaver og erlendir viðskiptavinir gagnavera 27%.

Fjármálaráðuneytið býr ekki yfir upplýsingum um hvert nýtingarhlutfall sæstrengja í eigu annarra er.

5. *Vita stjórnvöld til þess að áformað sé að leggja fleiri strengi til eða frá landinu? Ef svo er, hvaða aðilar standa að því?*

Erlendir aðilar hafa haft uppi áform um undirbúning að lagningu sæstrengs milli Íslands og Norður-Ameríku. Um er að ræða hóp manna, aðallega bandarískra, sem hafa þá trú að gagnaveraiðnaður muni vaxa hratt á Íslandi. Þeir hafa á síðustu missirum unnið að því að afla fjármagns til lagningar slíks sæstrengs. Í þessu sambandi er vert að nefna að næg bandvidd er til í Farice og Danice sæstrengjunum til þess að þjóna íslenskum almenningi, gagnaverum og öðrum um langa framtíð.